

03/09/2001

PM sebak dengar puisi Perjuangan Yang Belum Selesai

KUALA LUMPUR, Ahad - Sajak hasil ciptaan Perdana Menteri, Datuk Seri Dr Mahathir Mohamad, Melayu Mudah Lupa dipersembahkan buat pertama kalinya dalam bentuk puisi dan lagu pada Malam Deklamasi Angkasapuri di sini, malam tadi.

Puisi dan lagu Melayu Mudah Lupa itu disampaikan Kumpulan Puisi dan nyanyian Ibrahim Bachik diketuai komposer dan penyanyi Khairil Johari Johar.

Bagaimanapun, ketika sajak keduanya, bertajuk Perjuangan Yang Belum Selesai disampaikan dalam bentuk lagu oleh penyanyi Nora, Dr Mahathir kelihatan tidak dapat menahan sebak.

Malam Deklamasi Angkasapuri adalah kerjasama akhbar Berita Harian dan RTM dan disiarkan secara langsung melalui RTM1 bermula jam 9 malam tadi.

Turut hadir isteri Perdana Menteri, Datin Seri Dr Siti Hasmah Mohd Ali; Timbalan Perdana Menteri, Datuk Seri Abdullah Ahmad Badawi dan isteri, Datin Seri Endon Mahmood; Timbalan Menteri Pertahanan, Datuk Shafie Apdal; Setiausaha Parlimen Kementerian Penerangan, Datuk Zainuddin Maidin; Timbalan Menteri Perumahan dan Kerajaan Tempatan, Datuk M Kayveas; Pengarang Kumpulan Berita Harian Sdn Bhd, Datuk Ahmad Rejal Arbee dan Penasihat Jabatan Pengarang The New Straits Times Press (M) Bhd (NSTP), Datuk Mazlan Nordin.

Dalam buku cenderamata Deklamasi Angkasapuri, Ahmad Rejal berkata, Berita Harian memainkan fungsi serius sejak awal lagi dalam memberi tempat dan memartabatkan seni.

Selain itu katanya, melalui ruangan Sastera dan Budaya; Persada Seni serta Bi-Pop, jelas membuktikan fungsi akhbar itu dalam membuka minda masyarakat terhadap seni.

Beliau berkata, Berita Harian juga menjadi pendokong utama aktiviti bacaan puisi bulanan oleh Persatuan Penulis Nasional Malaysia (Pena) pada malam Sabtu pertama, setiap bulan di Rumah Pena di Jalan Dewan Bahasa.

Majlis dimulakan dengan penyanyi Safura menyampaikan lagu puisi hasil ciptaan Lim Swee Tin bertajuk Sese kali.

Pengarang Meja Sastera dan Budaya Berita Harian, Sutung Umar RS atau Wan Omar Wan Ahmad turut mendeklamasikan sajaknya bertajuk Nurl.

Antara penyair menarik yang mendeklamasikan sajak pada malam itu, termasuk pemenang anugerah SEA Writer Award, Lim Swee Tin; Intan Marhayu dengan sajak Rahman Shaari bertajuk Pesan Ibu Beribu-ribu; penyanyi M Nasir dengan puisi lagu Bila Rumi Menari dan kumpulan Koprata dengan sajak Permata Untuk Isteri, ciptaan Abdul Aziz HM.

(END)